

郭襄靖公遺集

郭襄靖公遺集卷之十一

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

諸議

南寧太守

威茂兵備副使

嘉靖辛酉南寧郡守

朝覲別所屬官僚

竊以守令之職一方之休戚安危攸繫責至重也
古人有躋歷華要而恨不及爲守令者苟居其位
而弗業其官則上負

明時下負所學多矣余自承乏以來勉思刻礪愧無
及民之澤然撫字一念則靡日不切切于懷也茲
當有述職之行謹記其切於民事數條與吾屬共
勉之庶有以助余弗逮以少答邑民戀慕之情云
一所屬地方田多荒蕪糧半飛詭故追徵之法須
責之該年催辦之人方有着落若拘獲甲首而

責以一冬錢糧拘獲戶丁而責以一戶錢糧或以豪右隱寄者之難拘而止責原戶賠納則監併者徒受苦楚錢糧終於難完矣至如徭編庫子斗級館夫禁子等役干係身家若官司不嚴爲稽查力爲樽節下人得肆需索之害其弊殆不可勝言矣余常戒此於庫禁諸役雖一燭一鍊之細不忍妄費充茲役者少得輕省所屬幸於此加意焉則民隱其可以少瘳乎

一鄉村之民固鮮知法然蠢樸之風猶有存者顧

治之何如耳此方差遣人役率多無藉棍徒每承牌下鄉帶領夥伴三五人不問事情輕重人犯牽連輒圍屋衝門多般恐嚇索騙錢財以致犯人畏懼從而逃避者原差人役卽捏呈拒捕打奪等情至有披髮裂衣以示逼切者官司不察往往添差拘提及一到官情無由達其受苦不可勝道矣良可憫也余常戒此凡拘人不到止罪差人故數年在郡未聞有奪脫人犯雖二三百里外以一紙召之無不赴者則安忍罪之

民哉

一所屬州縣隣逼寨峒相習爲非者固有之但遍觀徃牘其被扳誣而斃于獄者常十之五六也蓋緣此方之民一被刦掠輒忿恚鄉隣不爲救護及疑附近惡徒仇家通誘刦害徃徃指名妄告或稱火光識認或稱訪緝得知或混稱賊黨等情官司一提到官若不先加詳察淫刑以逞安得不自供認以少湏臾無死哉余累累鞠審盜賊旣畧得其情矣乃詰告者曰某某係不救

護者汝何妄告之則對曰見賊不救如同故殺
如何不告又詰之曰某某係與汝因某事訐告
有讐者汝何妄告之則對曰彼與我有深讐必
其所通引者如何不告又詰之曰某某雖素爲
非其引賊全無指證汝何妄告之則對曰凡賊
必有脚是以告之推此則誣者何限也蓋告者
亦不自知其爲誣矣傳曰刑者成也一成而不
可變也可不慎乎

一此方之民性愚而氣勁往往因事鬭爭小故或

因公私逼迫及婦人被夫姑忿罵多有服毒繫
頸投河而死訐告到官審原被告犯干證人等
果係自盡速爲剖理或應追給殯埋銀兩或止
令買棺收殮即數詞可決也若不問致死根由
槩行委官檢驗則器皿之費需求之苦難以勝
計死未及殮而家已先傾村已先敗矣及展轉
供招遲延歲月原被之監禁干證之羈候又因
而致死者常多也傳曰與其殺不辜寧失不經
可不慎乎

一天下之事惟公可以服人凡上司受詞原出無
心問理之官據情定法求此心無愧足矣乃或
曲意迎合枉其是非以爲阿奉之計則所損多
矣又有反是者則怪小民越訴從而監禁之或
堅執已見益重其罪罰或制其隣證使不敢言
或更易其卷案追毀其契帖必求伸彼抑此而
甘心焉夫不得其平而鳴者人情也果若此則
小民之寃將何訴耶余無他能每切以此爲戒
上官大夫亦幸有以亮我也

一司牧之職惟寬足以容人邊方之民不諳律法其詞狀多係倩人代寫往往虛架重情以求准理如抄蕩家私強牽牛隻及指姦親屬等事皆常談也若不原其情槩擬以反坐之罪曰將懲一而戒百也殊不知朝罪而夕踵之謂足以警他人乎必憫其無知少從末減而後民可措手足也且閭閻困乏視中土懸絕擬罪之時貧而無力者蒲鞭以示之辱次者擬稍有力其情深重者擬以有力之條及不能贖又從而改之仍

親自詳定不可強就重罰余徃徃見州邑以上
司之事多擬有力以示無私使民蕩產傾家其
何忍耶余無他能每以此爲戒天地鬼神其有
以鑒我矣

一鄉村小民所以不敢入城見官者非小民之本
心也皆由附郭田主歇家及熟識之人或包收
其錢糧而未納者或攬當其差役而多派者惟
恐原戶得知情弊非彼之利矣故每見村民入
城則多般嚇害串令吏書襍出小票催取遠年

丁糧餘銀房價喪禮土兵馬價及胖襖鐸木各色水腳等項不問是否本戶差役混稱某里告貼東拘西喚使村民身無所容復求田主人等代爲用錢使釋間有徭強敢於赴官者官不加察亦曰此戶之人果素躲避糧差者輒監候追併村愚之民誰爲辨訴之苦蓋萬狀矣父兄子姪有來奔告者其被嚇害如前不得已仍浼田主人等到官保認揭債賠償方得脫身回村不數日而債主保家紛紛至矣致使村人視公門

若鬼闕終其身不敢復向官司一訴無名索騙
以一科十惟田主歇家而無少違焉此地方之
通弊而宣化一縣爲尤甚者民如之何不逃且
盜也至於異省放債之徒違禁取利措留文契
准折人畜及將病故親屬棺柩停頓鄉村不肯
埋殯肆爲嚇騙之計稍不如意則捏告中途搶
奪或悞死幾命埋沒人口等情其爲民害殆難
勝言皆不可不熟察也

一官無崇卑均有子民之責其職之當盡心之當

存一也郡邑之官分當恪守名節愛養生民不待論矣他如首領巡捕巡司及哨堡等官隨其所治之事所轄之人其有關於生民利病亦非小也奉斯委者其思曰上之人所以委我者以集事也以治人也非以顧盼我也苟存心於愛物於人必有所濟雖無甚遠大之期然無忤乃心無忝乃職陰德之所積足以移後人矣以是思之以是行之其有害民者鮮也不此之思而曰吾之進步幾何而效人繩尺之守以自束縛

耶此念一萌奪於妻子縱其奴婢喪失其惻隱
羞惡之良剝誅求孜孜爲身家地者殆無所
不至矣是民之賊也縱苟免戮辱而鬼責人非
子孫其能保乎是不可以深鑒也

諭郡中父老

職叨守邕南踰五載矣念地方疲敝撫字之心時
切惓惓但智識寡昧惠政未敷今復有述職之行
爾民念我依依相戀我亦何忍而舍爾民耶惟念
民性蠢朴往往無知而罹于法心甚憫之略記數

條相與勸戒爾民信而守之即我之在郡時也其
毋相忘

勸爾積德毋作狂民禍淫福善天道彰明

如欺虐孤寡誣陷善良及隱匿姓名告言人罪
謗毀陰私使人不得自明一切利己害人之事
皆損德也

勸爾力業毋作惰民仰事俯育責在此身

如不務耕作專一飲博荒淫至蕩產傾家而不
自顧者亦有苟且聊生不爲身家長久之計或

逃移外境或倚住他人及欲復業之時則田被
豪強隱占戶積飛詭稅糧甚至誣爲盜賊而不
敢出訴終身逃竄無可安生之日皆由不力業
所致也

勸爾敦倫毋作逆民五倫攸斃何以曰人

如父葬之俗最爲悖理父母之愛子也毫髮痛
癢無不體察爲人子者忍以炮烙之刑報父母
耶又或因小利而傷至情以小怨而忘大德凌
挾官長棄悔婚姻之類皆非美俗也

勸爾息訟毋作刁民耗財妨業有辱無榮

如懷挾小忿而誣以強姦親屬鬭爭小事而誣以抄蕩家私及捏告通誘盜賊強牽耕牛搶奪財物等事反坐之罪即擬徒流悔之將何及也
備兵威茂邊防議

爲議處邊防以圖安攘大計事照得吐番之患其來久矣本道所轄地方自茂州之北長寧一帶關堡謂之北路又自長寧之北疊溪一帶關堡謂之疊路與松潘南路接壤二路諸番最稱桀黠西路

保填次之東路上南下南二路又次之各路地方
歲撥成都寧川重慶大渡河灌縣各衛所官軍戍
守共計三千二百員名而北疊二路居其二輪班
更戍百有五十年矣先年諸番大肆猖獗占據道
路阻截糧運戍守官軍被其荼毒不可勝言每歲
官賞費至鉅萬而私賞復數倍之自兵備韓璵朱
統總兵何卿議攻五寨三溝之後諸番一時斂戢
歲賞之需所僅存者十之一二惟牛尾麻答樹底
雙橋楊柳巴猪雙馬列角曆日黑虎等寨生番因

據河西之險時或出沒爲害而北疊永鎮太平新堡實大松溪諸關堡尤爲要害之衝近年以來稍稱寧靖但逞其無知之性恣其無厭之求官賞不足凌逼戍軍賠補不得已私買酒布以湊賞之蓋自彼時已然而節年爲滋甚者也且新班到堡有歡喜茶飯之費諸番往來有日生酒桶之費稍不如意則射箭掀石以阻經行官軍懼罪惟其所索而莫敢誰何扣減月糧借貸商債所謂終日不能一飽因之致病而死者誠有之也本道到任以來

痛念戍軍寒苦嚴剝之禁定放散之期永太二堡嘗買米分給以濟其饑北豐二路嘗命醫布藥以療其病土地嶺堡嘗製給綿衣以禦其寒又爲之議允戍軍病故者給之棺木是皆沾沾小惠無濟於窮戍之一二至其所云私賞等費則固欲減之而未能欲禁之而不得坐視其饑病死亡而不爲之所於心誠大有不安者矣茲者幸蒙本院加意邊防垂恩戍卒案行查議必欲爲久安長治之圖誠萬姓更生之秋庶務更新之會也本道敢不

仰承休德盡摠一得之愚以備採擇竊謂自古御
夷之道恩威並用而已所謂恩者羈縻之仁也所
謂威者防禦之畧也爲今之計欲示羈縻之仁非
以官賞而代私賞不可也欲嚴防禦之畧非以主
軍而更戍軍不可也夫蜀之番情與北虜異北地
平曠彼可以往我兵亦可以馳若蜀邊之地自灌
口以至松州幾及千里兩山夾河僅通一線之路
碉寨星列悉據山巔每十餘里方設關堡一所皆
在其巢穴之下自茂州鎮西橋之外凡糧運經行

必三日始一哨送或公差急務間一護而行之其
閉堡堅守之時居多也卽此一線之路在我軍之
經行有限在諸番之往來無常我軍經行諸番可
得而指數之諸番山後出沒藏伏我軍之哨探所
不得而及也諸番陟險奔高捷於飛騎潛繫溜索
頃刻可渡百人我軍之望番寨則爲仰登非桴筏
則臨河不敢以渡也諸番乘夜以數人占架險嘴
我軍雖千百之衆却步而不敢前諸番隔河結石
爲窩穿隙放箭我軍百矢徒發反爲彼收而用之

也是險夷高下之形強弱勞佚之勢較然矣况種族繁多菁山環匝不能一掃而蕩之亦明矣故自昔經畧之臣皆治之以不治非甚馮陵不事征討且從而賞賚以撫綏之譬之牛馬然羈縻之而已矣在松潘有元旦大賞有朔望小賞有二月小賞威茂止有二月小賞但舊賞太多自裁革之後分散不給求索不已此私賞因之而增軍士因之而困也醜類無知視爲應得官軍立有私簿相沿以爲定規一議減革則羣然起而爭之糾聚阻掠爲

害不小必欲大舉以挫之則兵連禍結無有已時
稍一不備反爲所襲如南路節年之事可鑒也夫
私賞旣不能革戍軍又不能堪非有攻圍墩堡阻
道殺人之害又難以遽議擒剿如之何其可耶松
潘南路小賞近已議允併爲官賞矣北疊接壤之
地事體相同相應計所私賞之需卽以後開所減
戍軍糧銀之內如數動支照依正賞事規俱解成
都府轉發資德內富等縣買解布疋牛酒每年於
附近州縣選委廉能官二員唱名給賞不許一毫

侵減則各軍得省虛費諸番得沾實惠無復有覲
覲之患矣故曰欲示羈縻之仁非以官賞而代私
賞不可也○夫各堡之軍有主有成戍軍之數常
數倍主軍而諸番凌虐外戍騷害無厭獨不及主
軍何也蓋強弱勇怯之分諸番視之以作止其惡
耳戍軍生長腹裏氣體本弱及撥班之時稍有身
力者往往營撥安閑關堡如永鎮太平諸要害之
地類皆弱丁代替及甚貧窘無藉者當之預支糧
銀盡入他人之手一至邊地風雪嚴凝衣被單薄

羸弱不堪者已過半矣況盔甲器械千無一備聚
臥營舍不敢一出堡門從來以主軍送哨戍軍賞
番已爲例矣諸番見其窮弱露刃拔箭益肆欺凌
又有在堡奸徒賒借番物不還反從而指導之戍
軍不勝逼迫雖剜肉以充犬羊之腹亦不暇顧如
之何不病亡相踵也然則戍軍之設非以禦番以
賞番也不惟填棄溝壑聞之痛心其傷天地之和
損中國之威甚矣若不力議掣回則戍軍積弱夷
性日驕縱增官賞以代之恐將來私賞仍不能免

不亦公私兩費乎昔之策士者有曰輪戍松茂非計也來者視爲傳舍曾無固心居者視爲魚肉率有侮心况所謂犬羊者乎及今不救竊恐虛耗之禍不在邊儲而在腹裏之地也蓋洞識之矣今請將永鎮太平普安新橋馬路五堡戍軍先行掣回而挑撥疊溪遊兵以實之如永太二堡每堡隸足二百名馬路新橋二堡湊足一百名普安堡湊足六十名俱令妻小隨住選委千百戶有才力者統之無事則常川訓練有警則互相應援偵探必嚴

哨護必謹各軍不惟固守關堡亦且自顧身家自無復侵侮之憂矣故曰欲嚴防禦之畧非以主軍而更戍軍不可也要而私賞不處雖主軍亦不能安主軍不實雖撫賞亦終無益是處私賞實主軍二事相須又不可偏廢者也○夫旣以官賞而代私賞示之羈縻之仁矣然馬雖羈不能不蹄齧牛雖縻不能不抵觸其性然也若非責有力之酋長以認守之能保其終不變乎如茂州東路有隴木長官司土官坤兒卜靜州長官司土舍法從武食

糧認守則白若羅打諸番不敢東侵上南路有打喇寨土舍折木加下南路有加渴瓦寺土舍賈思巴食糧認守則黑虎草坡諸番不敢南侵疊溪有長官司土舍郁白什結食糧認守則龍池松坪諸惡番不敢爲疊溪患盖有所保認則有所責成必然之勢也巴猪等寨所以負固爲害者以無所制服故耳今查得巴猪曆日雙馬列角等寨先係長寧安撫蘇歸漢所轄今安撫蠢弱不行約束馴致肆然無忌當責之蘇歸漢嚴加鈐制而認守長寧

穆肅實大松溪一帶地方又查巴猪五族有排柵
營食糧牌頭卓太兒可以制之當責之認守馬路
新堡一帶地方白泥麥兒潔白溝等寨有疊溪長
官司土舍郁白什結及結角殺可以制之當責之
認守普安新橋漢關墩一帶地方楊柳牛尾麻答
等寨有呷竹叻嘛蘿蔔溝寨食糧牌頭賀白小么
兒子可以制之當責之認守永鎮太平一帶地方
黑虎七族最強先有竹木坎寨番牌白勺兒認守
但寨小力微未可用以制服當責之岳希蓬長官

司土舍坤安及打喇寨土舍折木加併力防禦而
認守松溪韓胡長安椒菌鎮戎一帶地方西路龍
溪卜南等寨亦責之土舍折木加鈐束之而認守
埧州坡底保子關橋一帶地方孟董梭城梁黃等
寨則責之雜谷安撫司鈐束之認守保縣鎮夷新
安乾溪古城通化一帶地方仍令其照依番俗砍
狗插血立碑各堡刺定賞需永爲遵守認守旣定
如各寨番夷敢有擾害關堡增索賞需則各土官
土舍番牌原領月糧定行追革各番另議擒治庶

地方各有責成而生番不敢肆害矣○夫旣以主
軍而代戍軍以嚴防禦之畧矣但關堡以扼要害
遊兵以備征調均不可缺者也若非募精壯軍丁
以充補之其何以備不虞哉疊茂遊擊原額遊兵
一千名見在止有疊所軍二百七十名茂衛軍二
百三十名茂州民兵二百名共計七百餘名今旣
移其半以實永太等堡恐不足以充調撥之用當
補足七百名之數查得先年疊溪所監生劉价有
罷外戍添設所軍之疏總兵何卿有罷外戍抽取

軍丁之請但議添設者欲改併四千之額議抽取者欲盡勾屯籍之丁故皆未經議行今查疊溪長寧茂州一帶有空間軍餘約可二百餘名生長窮邊慣習風土遇敵敢勇比之釋鋤充數者大有不同相應遵照近行勘合事例驗其年力精壯者先選而收之以補故絕之軍許其預支數月糧銀以備衣甲器械俱充遊兵各隊聽遊擊衙門加意教演分布防守一面行令茂豐各衛所將節年逃故旗軍係川省附近州縣者并疊所額守操丁盡數

查出速行各原籍清勾解補儘充遊兵之外其餘
仍發衛所城操各要着役終身以便訓練其戶衆
原約幫貼衣器銀兩併令州縣官立定合同依時
給與不許五年十年輒告更替庶遊兵旣不缺人
而營伍亦可充賞矣○然所謂撫賞者因其柔服
而撫之可也專事姑息不可也盖犬羊之性無常
叛服不一久矣名爲熟者多懷陽順陰逆之心名
爲生者亦皆平日之受賞者也自擅殺熟番之禁
嚴掌堡之官有以此死于獄矣有以此罹于罰矣

或當時官司知其緣由議以爲功數年之後刁惡之徒有以擅殺冒功訐之竟抵于罪或指此挾制騙害多端如晏麒秦俸等是也至今邊軍相戒垂首喪氣坐視番夷進堡凌虐求索而不敢操刃一向之非誠甘心也制於法也都御史馬有疏亦極言之矣今各番族類之繁者固未可輕議即如麻答一寨不過五六十番耳稔惡恃凶橫行於松之平定茂之永鎮二堡官軍切齒痛恨欲啗其肉竟不敢一收而殺之此士氣之所以日餒而夷志

之所以益驕良可恨也茲欲申飭邊防必少寬擅殺之禁出示各堡曉諭官軍仍責令通事譯傳

朝廷殺伐利害如各寨番夷悔心效順則歲受賞需聽其照常往來貿易相安於覆載之天敢有仍前爲患或上道阻梗或入堡邀索是自作之孽非我軍生事惹釁者比許各官軍相機度勢輕則綁解本道或叅遊官以軍法處治重則斬級報功轉詳議賞該堡明存卷案使日後奸徒不得肆其挾騙提督掌堡等官亦務要嚴禁軍兵不許賒貸番物

包領番籌以開釁端以自取重罪如此則威武振
揚士氣自倍番夷聞風震懾何邊患之足虞耶○
所謂罷戍者因其無益而罷之可也槩議掣回未
可也蓋疊路各番最强疊路各戍最苦不惟饑病
死亡爲宜憫恤且啓侮損威所謂有名無實有害
無利去之當如救焚拯溺也人無不知之亦無不
能言之所以向不敢議者爲賞需故也蓋以議革
私賞恐招啓釁之咎議增官賞恐貽冒破之譏殊
不知一掣數堡戍軍幾及千人歲省萬斛之糧歲

活數百人之命視添賞之費不過取諸所省者一二以充之其多寡利害相去何如而欲避此嫌議驅無辜之民置之必死之地哉若疊溪坐營新堡備守并西北東南各路戍軍共尚有二千餘名非不知其無濟於用所宜一併議革但召募軍餘既無多人而清勾逃故又未能卒至相應相度緩急量議裁減其所留戍軍既免賠賞之費又無饑病之憂仍應整頓以不虛設戍之意查得舊例每年九月十五日發班限十月十五日到邊更替比蒙

本院又委灌縣掌印官查點法至密矣但發班之後各散回屯籍取帶衣糧往往發班者一人而赴戍者又一人發班之時借甲應點而赴戍則身無片甲及至灌縣參差散漫領軍官旣莫之奈何即委官亦不過取數了事而已似此遣戍不足壯威徒糜糧餉何益哉合無行兩司清軍道重夔兵備道及都司先期行各衛所曉諭各輪戍之軍務要正身的名置備衣器仍請本院行委驗糧通判并指揮一二員於蠶崖關逐名點進令委官將發點

文冊用小刺印註不到及無甲無器字樣於各名
之下繳報本院批行查究其都司原送本道總冊
亦徑發與委官照依填報本道點發各堡既有衣
器聽叅遊及提督官不時巡視各堡與主軍一體
操演久之同一練習同一奮勇均爲有用之兵矣
如此則去非苟去留非濫留城堡皆可有所備何邊
防之不固耶○及照選將練兵安攘急務將貴勇
兵貴精此定論也先談本道帶管松潘通歷北疊
二路并松潘南路一帶關堡兩鎮番情此爲最急

自疊溪至松城幾三百里無一將領往來巡視而
防守之責一以付之指揮千百戶等官坐致威令
不揚武備日弛番夷窺伺猖獗有由然矣查得松
潘疊茂二遊擊係先年都御史劉 奏設一駐劄
蒲江關一駐劄疊溪城不時提兵往來巡視自總
兵何卿克平諸寨南路稍靖疊茂遊擊始專駐疊
溪松潘遊擊始專駐小河本道於四十一年十一
月內呈請兩院查照嘉靖二十六年兵部題奉

欽依事理議以冬春二季松潘遊擊移駐蒲江鎮平

等堡疊茂遊擊移駐永鎮太平等堡併力防禦遇
警應援已蒙批允通行遵照去後但恐日久事更
相應申明前議行疊茂遊擊如遇冬春水涸番情
緊急之時帶領遊兵移駐永太二堡嚴督官軍用
心防守其墩堡邊牆有未脩者督之使脩衣甲器
械有未備者責之使備如有生番出沒上道爲害
本官即便督兵擒截毋得因循釀成大患併行茂
州叅將亦不時巡視松溪實大新堡等處一體嚴
督慎固兵防以不負分閫之寄可也其各路提督

官干係至重例由本道請委取諸茂衛指揮或素有才力千戶間一委之附近之官則於成都寧川等衛指揮中選用但邊方用人與腹裏不同聞其爲能而委之試多弗效因方呈允難以遽易不免致悞邊事今後提督員缺聽本道於兩司清軍道或都司查取赴邊試之數月方行呈請則所委無不得人而邊防深有賴矣此皆選將之屬也

凡衛所軍餘精壯者俱撥守關堡及充遊兵其在城操者率多老弱充數況又有跟官公差等項可

以備戰鬪者十無二三節經本道查點疾弱者更替之逃亡者勾補之關堡稍緩者掣回之又另行挑選茂軍精銳者五百名委指揮李序百戶李仁張袞統之日逐操演五人爲伍十五爲隊隊有長各有旗色以爲之別每伍則鎗手一牌手一弓弩手三又令之演放鳥嘴銃九龍桶等法本道同叅將官時一演視中者賞之中多者厚賞之不中者必示之罰即今訓練頗習可稱精兵其餘門禁城鋪各軍兵操三歇五原有成規未嘗少懈先時水

磨溝等寨惡番時在茂州社壇村左右捉擄樵牧
近年頗知畏戢不敢肆害或以有兵之故也已行
威疊灌三所如法操演去後但疊所有遊擊駐劄
自知訓練而威灌二所非本道專劄之地因循玩
愒勢所不免合行州縣官一體督視謹嚴城守務
使有強兵之實可也其茂威二州食糧民兵皆係
羗民本精悍可以禦敵但羗民屬之有司雖撥在
關堡而提督掌堡等官不能盡以法約束之往往
食行糧而營私事寄空名而應別差本道屢次查

點革去劉廷表等六十餘名不可勝革今後併責
州縣官時加查究務令常川在堡協同官軍防守
不得仍前姑息縱容閒逸及別項差遣則養兵皆
有實用而地方可無虞矣此皆練兵之屬也二者
之中又以選將爲要將得其人則凡繕葺墩臺完
備器械謹嚴哨探與夫鼓舞簡肄之方拊循駕御
之道皆其所能爲之事也以戰則克以守則固以
撫以賞則懷服而不敢叛其機在我而無難矣脩
內所以攘外其古今治夷之要術乎以上數條言

雖有別意實相因皆事之必可行勢之必不容緩者也振頽起弊之方寔不越此如蒙採納特賜允行邊鄙幸甚軍民幸甚本道瘼曠之罪亦可少追萬一矣○再照威茂一邊糧餉其買運由驗糧官其收放由監收官本道雖兼綜理之名不過稽查之督責之而已如倉場之弊多端本道立各年額坐循環而完逋可考立各官流水循環而收支可查又革攢典較斗斛以及糧案號紙通關悉有稽覈如驗糧之弊多端本道立挨撥之簿使糧運不

滯立交押之單使糧運不侵以及截攬撒秋等弊
久有嚴禁奈更代不常法守易廢求無弊不可得
也若使驗糧官有定員駐劄蠶崖關專督買運之
事監收官無他委往來長疊等倉親任收放之事
專志幹理著實舉行則夙蠹自無不革矣其布政
司解銀發貯州縣必經本道轉文各委官領銀給
散官軍必經本道發案而稽考出納清查逃故則
各有循環簿卷月報倒換合再行所屬州縣并各
委官嚴加防閑稽察毋容吏書欺隱則奸弊自無

所容矣至於衛所造支糧料及請給銀兩等項則尤不敢不嚴爲之稽考也自本道到任以來凡逐月查出逃故開除及臨散扣回計不下二三千兩此因戍軍逃故之多故所除扣亦多難以槩執其議革單馬歲省料銀五百餘兩議革各官炎涼馬歲省料銀二百餘兩革試百戶冒糧歲省銀一百餘兩革充發軍行糧歲省銀三百餘兩減回土門堡提督軍歲省行糧銀四百餘兩但衛所卷案往往被書識毀沒官更吏改則朦朧復申請給及批

行查議則檢遠年文卷以爲憑證此積弊也又如
茂疊威灌各衛所每年表箋祭祀完銷勘合照刷
文卷及都司紙劄總兵山川圖冊水脚盤纏叅遊
慶賀

表文各色公費請支空丁商稅屯糧等項銀兩原無
所載只據抄白舊案開稱前院前道准支字樣中
間恐有書識捏案多支甚難稽考又有指此科派
動輒軍三餘二半入積棍之手如茂衛書手方斌
等之科斂疊溪書手郭淳等之冒支皆是也俱合

查明的議定數另行刊刻載之永久庶可以杜去
籍之奸省查駁之煩而盜支加派之弊皆可革矣
爲此今將前項緣由并戍軍應掣應留主軍應撥
應補及賞需數目逐一開欵呈請伏乞照詳施行
清查邊儲議

爲清報邊儲完逋以便查究以釐奸弊事照得成
都敘州重慶等府嘉眉潼瀘邛雅等州所屬各州
縣歲派茂疊威保汶灌一帶邊倉額糧每歲不下
數萬石專備威茂一邊各衛所及成都寧川重慶

大渡河等衛所額撥戍守官軍行月二糧與茂威等州縣官吏師生廩糧等項之用蓋備守邊疆以護內地轉輸餽餉以養邊軍相湏以濟維正之供其來久矣但查近年以來各州縣額糧所完報者僅十之六七而拖欠數多往往倉儲告匱軍士告饑至如廣備安遠保坭諸倉粒米無積枵腹待哺識者深爲邊鄙之憂究其侵逋所由稽查之無法追究之不專故也查得各州縣之糧或各解戶攬收侵費而全未起解者有之或已解到司轉發驗

糧官收買通同店戶放債撒秋而不行買運者有之或解戶替身希圖侵分糧價腳價被無藉棍徒私自截攬因而拐騙者有之甚或驗發過關解戶通同腳夫沿途賣費而私自逃回者有之督糧道有督催之責不能時知其完欠之數本道得稽其完欠之數而向無催督之規監收官收其已到之糧而不追其所逋驗糧官驗其已買之糧而不究其所終及至兩院委官查盤法甚密矣然奉委在州縣者查出某某未完矣必將曰各解戶尚在倉

候領通關緣無的數難以懸知其侵欺之實奉委在邊倉者查出某某未完若干矣必將曰各解戶已回籍湊取米價緣未到官難以徑坐其侵欺之罪故在州縣者或擬查明另究在邊倉者或擬抄招轉行如四十年查盤長疊等倉解戶謝天佑等三十四名廣備等倉解戶李正副等四十三名保縣等倉解戶彭甫等六名俱係抄行監收官轉行路遠人多終無下落蓋各事其事不相關白各民其民不相統轄催查徒具於文移奉行未見其實

效遂使侵逋之奸得以幸脫罪網其一二抵于罪者或監追或保候或將祖名僉作解戶而捏稱已故遷延辯訴竟從末減或年遠產盡而糧終於不完矣此侵欺之所以益衆邊儲之所以益虛也即今幸蒙本院委官清查各府州屬錢糧戒諭諄切正釐奸明法之時各委官當無不盡心所事矣若不稽覈完欠之數轉發清查則批解家屬臨期推托必不肯供報未完實數懸空定擬終啓辯脫之門積奸巨猾恐無所懲而所云前弊者或猶不能

以盡革也已經本道行令監收通判束載將威茂
一帶各倉糧自三十五年起至四十二年止除已
掣通關外其未掣通關完欠數目查覈的實開報
到道復經本道分別各府州所屬各另造冊一本
呈報伏乞分發各委官就近清查明正侵欺之罪
嚴責完納之期若有妄執驗糧通關零碎單票載
有米數混稱納完者俱不准信庶奸巧之徒無所
藉口以幸脫而法紀可明邊儲可實矣再照天下
之所不可廢者法也小民之所欲訴者情也三蜀

之民自採運大木之後荒旱頻仍疲敝特甚積逋
於數年而併追於一旦未免有不堪之患仍乞本
院鈞裁將三十五六七三年念其正當多事之時
如係花戶拖欠姑准設法帶徵或已徵解未獲通
關與三十八九四十二年未完者嚴行追究其四
十一二年見解未完姑令責限徵運候委官查盤
邊倉之時另行追究庶罪無濫及事可易完催科
之中亦不失撫字之意也及查灌縣永積倉額坐
千戶所屯糧本色一千六百九十二石拆色銀九

百四十餘兩灌縣本色民糧五千二百石又邛均
崇寧大邑四川縣額坐本色民糧共一千七百三
十一石折色銀一千五百六十七兩以上通共本
色八千六百二十一石折色二千五百餘兩除縣
所官吏旗軍人等糧俸銀米間支每歲額支本色
不過二千石尚餘六千六百有零非專爲該縣所
官軍而設以該縣係威茂諸邊咽喉之地一遇邊
倉缺乏例以轉運接濟其爲慮蓋深遠也近來灌
縣官吏視爲存積贏餘之糧全不催納其三十九

四十等年分該倉糧米向未起徵吊查各解戶實
徵官簿並無派撥倉糧花戶數目此稽違之罪在
官而不在小民也已經督糧道行委通判傅以智
督徵隨以去任仍復停閣合無候詳允日本道會
行督糧道嚴責接管通判顧天祐刻期徵納限四
十三年五月以裏盡數完報則邊陲有緩急之備
而小民亦得免罪累之苦矣蒙

巡按御史鄭 批所議深切邊儲積弊俱照行繳
優恤戍軍議

爲議處守邊病故戍軍以示優恤事照得成都寧
川重慶等衛并大渡河灌縣等所額撥官軍備守
松茂二邊各路關堡一年更替緣二邊俱係諸番
巢穴之中而關堡之設尤在孤懸要害之地兩山
夾河僅存羊腸徑路濕霧侵薄終日陰霾風霜徹
骨寒苦數倍內地以致軍士至彼不服風土疾病
常多又撥出軍士半係屯籍餘丁預支銀兩往往
正軍自領而戍守者空身赴堡糧未及支債已先
揭因而饑餓瘦損者亦多如茂疊之永鎮太平新

安乾溪等堡實大土地嶺等關松潘之平定靖夷
蒲江北定等堡風洞雪欄等關每歲戍守軍士死
亡者常十之二三屍骸委棄深可憐憫本道自到
任以來節行各路提督及掌貼等官凡遇軍士病
故即行設法瘞埋毋令暴露但思各軍皆生長內
地撥守邊疆執銳披堅哨送糧運番夷桀黠出一
生於萬死之中至以饑病死亡妻子不聞棺木不
具填委溝壑畧無優恤之患不惟於心不安其有
傷天地之和甚矣然所以因循而未及議處者一

以死亡太多錢糧有限不敢輕議施給一以各路
關堡相距鎮城頗遠棺木不能卒備且有遠運之
難故也合無今後議將茂州威州扣留逃故軍士
銀內每季各動支銀一十兩委官一員督匠置辦
板木各二十五副運發緊要堡分付提督掌堡官
收掌如疊路北路東路戍軍病故給以茂州所發
之數如上南下南及西路戍軍病故給以威州所
發之數每季終各州將置發過數目各路提督官
將給用過數目申報本道查明本道於每年十月

更班之後備造一年總數繳報兩院查考仍乞行
松潘兵備道一體施行如此則殞首邊疆者得免
暴露之怨而服勞戎伍者益勵勇奮之思其激勸
之心培養和氣所係非淺淺矣再照各衛所戍軍
有指揮千百戶等官統領備守所以撫恤之而使
無失所者各官之責也訪得統領之官其畏法恤
軍者固有之而剝害軍者常多或通同識字旗
吏而剋減口糧或指稱紙劄公費而科斂銀米甚
或縱容賒買番猪番牛芫根稞麥等物負背不還

致其上道爲梗阻截經行不得已扣減口糧加倍
賠償以求息釁遂使軍士益窮死亡益衆皆戍守
各官不善撫恤之咎也累經本道出示嚴行禁革
稍知遵守近來死亡頗少緣戍守各官向無獎戒
之規間有立志向上效勞恤軍者無所別白而卑
污廢事者亦得以苟避譴責以致剝削成風軍士
困苦日甚查得四十二年班滿備守永鎮堡百戶
龔仁和范英馬路堡張渭新橋堡黃寬各官防守
用心恤軍無擾本道已經分別次第措備銀花綾

紅盛張鼓樂行茂州及衛所等官以禮導送出城
以示獎勸外合無自嘉靖四十三年起以後凡遇
班期將滿聽本道將領軍指揮千百戶等官查有
撫恤軍士守禦勤慎摘其尤者數人開註考語分
別等第先期呈請兩院批允之日量支本道贓罰
買辦花紅用昭獎勵其剝削軍士守禦踈懈者酌
量輕重戒治如此庶賢者知勸不才者知警將必
有與士卒同甘苦之徒者出軍士感恩思奮亦必
有知親上死長之義者矣奉巡撫陳 批收斂亡

卒得掩骼埋胔之政旌別將領有舉賢懲惡之意
俱依擬施行繳蒙巡按鄭批據議優恤厚於戍
卒勸懲別於將領意美法良相應如擬該道着意
舉行卽著爲例可也繳

請催兵備將領以固邊防議

爲請行催兵備將領官員赴任以固邊防事據松
潘南路掌貼平定等堡成都松潘二衛千百戶彭
誥馬勇等報稱本年十月內各職奉委守堡到堡
未久節被樹底雙橋挖撒等寨番蠻化禹兒子等

日每來堡生事爲患強索布絹酒肉香茶一日給之二日不足二日給之三日不足三日不給上下兩門抽刀射箭在堡橫行剝削軍衣搶奪貨物攪擾不得安生又上登麻搭下登三哨架嘴掀石阻嚇經行若不請示殄除未免官旗後患喪於巢穴犬羊之手等情到道看得松茂二鎮設在諸番巢穴之中各路地方俱屬要害不可一日弛防而松潘之南茂疊之北二鎮接壤各關堡雜處樹底雙橋挖撒等塞番夷強衆自古爲患而近年尤甚卽

今臨冬水涸聚衆入堡橫索無厭且據險肆惡阻截經行而守堡官軍運糧解脚不勝受害節據各關堡等官申報前來本道查訪的實屢行松潘代行總兵事叅將賀麟見疊茂遊擊曹堂孟設法處治及行各提督掌堡等官嚴加隄備并切責通事人等諭以

朝廷恩威本院號令稍稍退戢旋復出沒邀索爲患漸不可長勢當預圖揆其所由路險山高番強軍弱自松潘百餘里至歸化歸化百餘里至鎮平鎮

平七十里至永鎮堡方爲疊茂之界以三四百里
極要害之地盡付之指揮千百戶之官無一將領
巡視往來坐致軍威不揚武備廢弛提督掌貼等
官因循苟且剝軍求和外衛戍軍以饑餓死者十
常四五此夷勢之所以日熾而邊防之所以日疎
也查得邊誌所載松潘遊擊嘉靖年間

勅諭內開下至江油縣上自漢關墩不時往來巡視
有警摘調各堡官軍協力勦殺所謂漢關墩者在
疊溪城外二三里之地是松潘南路歸化蒲江鎮

平一帶以至疊溪皆松潘遊擊官所當守之信地也又查疊茂遊擊嘉靖年間

勅諭內開下底茂州上至鎮平歸化是松潘南路一帶亦其所當協守之地也先年各照信地松潘遊擊駐劄蒲江關疊茂遊擊駐劄疊溪城遇敵夾擊地方頗寧自總兵何卿分守松潘克平諸寨番夷自是懾服不敢肆害者二十餘年遊擊之官乃移駐小河久不提兵巡視乃今番衆猖獗關堡孤危大非昔日之比矣疊茂遊擊駐劄疊溪與一帶關

堡密邇猶得相度事勢隨宜策應而松潘遊擊乃獨專割小河處於安靜平穩之地恬然若不屬已因此疊茂遊擊每以侵越自嫌又且求鎮堡以址有麻搭嘴洞子溝極險之區番夷專一據此占架疊茂之兵雖有千百之衆難以徑達不過聲援而已遂使平定靖夷等堡勢益孤懸各番縱橫無忌而望救松城又在數百里之外數堡官軍束手受害職此之由也今照歸化鎮平二堡俱有寬大館驛一所先年松潘遊擊提兵南巡必以二驛及蒲

江關爲屯劄之地爲今之計議將小河遊擊仍照
勅書每年於冬春二季河水乾涸之時統領部下遊
兵前來歸化蒲江鎮平等堡操練防守縱不能遠
至疊溪漢關墩而松潘一帶地界常川巡視遇有
番夷出沒小則徑自擒捕賊衆數多則會同疊茂
遊擊督率官兵夾攻而疊茂遊擊亦不得自嫌侵
越務要協心併力共靖地方夏秋二季仍聽松潘
遊擊回駐小河衙門以爲休息之計帶領遊兵原
有口糧不得重支冒費如此則松潘之南茂疊之

止一帶邊境可安而全蜀之藩籬永固矣及照松
潘南北各路番夷每歲元旦例赴松城受賞先年
不過千人漸至二三千之衆自三十九年至四十
一年就賞之番至七八千人賞需之費措處之難
且不暇論矣南北二番挾讎構怨雖禁諭鎗刀器
械寄放歇家而身藏短刃輒就衛堂互相戕殺舉
城攘亂兵備總兵等官竟不能制彼時得於聞見
者至今寒心仰仗

天威自無他患但犬羊之性馴擾終難善後之圖誠

不可不預爲之計也今兵備未任而以本道帶理
總兵未任而以叅將代行元旦已逼賞需未備屢
經行催而綿州彰明安居坐買等州縣距茂頗遠
且稱年歲饑荒布價高貴至今未有回報將來濫
惡稽遲恐所不免再照松潘一鎮設有衛所而無
州縣官皆武弁而非民牧一應錢糧出納屬之監
收經歷一人及該衛掌印官近查造報糧冊四所
并各路以逃故扣除者千無一二其監收門番等
稅徃時茶鹽牛羊之課數倍茂州凡賞需不足賴

以充用近攄每季所報者甚少尚不足以供朔望
小賞之費屢經戒諭所益無多本道遠在茂州相
距五六月之程安能逐時查覈隨事稽察而使之
無弊哉况今南路關堡申報紛紛灌縣地方盜賊
生發本道以綿薄之軀淺昧之識而當二鎮極重
之責臨元旦大賞之期夙夜兢惕寢食不寧雖殫
心力之圖深切稽悞之懼今查得該道兵備副使
魏文煥總兵汪輔遊擊周宗皆受

命日久向未到任軍餉邊情干係重大兼攝遙制事

勢甚難伏乞軫念軍國重務移文各官原籍催促
星馳赴任併將前議松潘遊擊責令遵照

勅書并邊誌所載嘉靖二十六年奉巡撫四川都御
史張 題該兵部覆奉

欽依准議遊擊往來巡視蒲江臆臘等處不許專駐
一處以誤軍機勘合事理往來信地冬春二季移
駐歸化蒲江鎮平等堡與疊茂遊擊併力防守仍
乞摘行安綿川北川東等道轉行所屬綿州彰明
安居等州縣各將坐買茶布等項作速買完運解

松潘衛聽候元旦賞給庶事體無悞地方無虞而
本道瘼曠之罪亦可少逭萬一矣奉巡撫陳批
查得松茂二鎮逼近番夷缺官防禦利害所關兵
備魏副使已行按察司催取矣總兵汪輔近聞稱
病周宗亦緣事聽叅深爲可慮仰道卽行遊擊將
軍遵照

欽依往來信地併力防虜不許專駐一處推奸避事
貽害地方法度森然決無輕貸賞番茶布亦行各
道專委能官收買運解如有遲違卽將經該有司

檄實叅呈以憑拏問此繳巡按陳 批除本院行
催外該道仍令關堡官軍比常嚴加防禦繳

請勦叛惡番蠻議

爲屢年叛惡番蠻擄殺軍民乞賜剿絕以靖地方
事案查嘉靖四十二年二月初九日奉巡撫陳

批據茂州靜州長官司申稱東路水磨溝小岐山
盧基鷺木如兒力等寨惡番頻年出沒爲患嘉靖
十八年岐山鷺木如寨番蠻出劫地名打狗壩殺
死軍人李思明等二十三年又出劫本處殺死軍

人苟廷四擄去男婦六名口本司土兵追殺賊首
牛保只首級解兵叅將二十九年捉擄男婦九名
是土舍奮勇殺獲番賊查祖及奪回人口解報劉
叅將三十五年又至地名小溝將舍人羅七義子
殺死并擄去男婦不還三十八年將東勝墩軍人
丁泰殺死侵掠不常土舍不忿整兵生擒兇首麥
各只解道發州監死嘉靖四十年五月捉擄州民
鄒表男婦四名當是土舍法從武率兵趕至圓根
坡殺番石墨吾首級解道四十一年十二月初十

日前番暗來插旗寨坐草捉去牛貳隻居民走報
本司調兵一百追入水磨溝口豈知番詭倖輸誘
我土兵伏番夾攻殺死效勞土兵余木的只諸保
祖谷只等四命綁去折六伯什則谷只多惹四名
鎗箭重傷未死五十餘人奪去器械七十餘件若
不早絕誠恐諸番長勢本司議同隴木頭等三長
官司揀選精勇三千請詳允日進攻惡賊使地方
寧謐等因奉批仰威茂兵備道查報奉此該本道
查得邊誌開載水磨岐山鷺木如等寨番夷宣德

年前屬靜州長官司管轄宣德以後背逆不服約
束常年出沒爲患該司署印土舍法從武欲自約
調隴木頭等司寨番兵擒剿前賊不費官錢不動
官兵蓋因讎復讎其勢難阻以夷治夷其機亦便
相應酌議行令法從武悉心熟慮計謀停當方許
進兵務爲萬全之計仍行茂州衛量動火器給助
本舍應用及行叅將李堯章遊擊曹堂孟將東北
二路關堡官軍分布河西搖振以防前項番賊奔
突之患時蒙巡按陳 養病回京去訖本道止具

由二月十八日呈詳兩院奉批依行土舍法從武殺賊報功重行給賞各路官軍布守地方以防外變可也繳依奉已經通行叅遊州衛等官并法從武等遵照及行茂州衛動支火器給領備用去後本道仍再三曉諭務令相機慎圖不許輕動及至四十三年正月初八日據靜州長官司報稱法從武設計爪探各番穴寨停當約同隴木頭長官司土舍何效義何敬國等調集驍勇土兵一千餘名於正月初四日酉時進兵次日寅時分兵攻打各

寨談本司土舍法從武法從兵克破小岐山寨殺
獲首惡一十一顆燒毀碉寨四十餘間鎗箭重傷
番蠻燒死在內不計其數隴木頭司土舍何效義
何敬國等克破驚木如寨殺獲首惡四顆燒毀碉
寨四十餘間掣兵全勝回司又據隴木頭長官司
土官坤兒卜申報相同又該叅將李堯章手本開
稱水磨岐山素稱兇悍習性詭秘僻處河東倚險
爲恃平時則聚衆結黨潛伏於龍洞石硤地方捉
擄樵牧貽患非一朝一夕被其害者孰無積憤殄

滅之心緣彼醜跳梁變態百出遽難禦防今土舍
法從武何効義等乃能奮不顧身直搗巢穴斬獲
番首數十餘顆碉房番舍焚燹一空百年之患平
于一時萬結遺冤伸于頃刻相應勸勵乞賜議賞
等因隨該本道行委威茂監收通判束載會同茂
州衛署印指揮田茂盛查勘斬獲首級要見某級
係某寨首惡某級係某寨餘黨各是否真正番賊
其舍兵爲首某人爲從斬獲某級分別等第賞格
酌議詳報去後今據呈稱依蒙拘集土舍法從武

法從文等奔通事王蠻定保長劉朝進及將殺獲
首級逐一查勘得四十三年正月初四日酉時法
從武預會土舍何效義何敬國何効臣何効仁率
領土兵七百名由神溪堡刁溪溝小路進入魏磨
寨沙灣分路至鷺木如寨等候法從武法從文督
兵四百名徑從魏磨寨水磨溝口由沙拐小路二
十里直抵小岐山寨天色將明法從武等舉銃吶
喊攻圍本寨各番男婦俱上碉房各執鎗刀弓箭
檢石對敵有土兵哭六奮力爲首四卜哭只爲從

斬獲首惡番賊血羅首級一顆又土兵兒伯什天
受兒卜只余保則谷只五名各爲首來只牙積六
兒卜甲豆只余木只哭勺勝保真里折書折咩只
各爲從斬獲賊黨甲石巴只等大男首級五顆又
土兵卜甲根血只各爲首切思七斤保余勺丟只
爲從斬獲小男首級二顆又土兵牛明胡保紅卜
只爲首列咩日保里力作六歪昔血保余六虎各
爲從斬獲女級三顆土兵三秋保作六各被石打
傷腰背土舍何效義何敬國等率令土兵伯什太

爲首什果只客爲從斬獲鴛木如寨首惡番賊呀
即首級一顆土兵聖保七斤保各爲首余落猪天
保哭只保余甲爲從斬獲番黨大男功二顆土兵
日只爲首什保六只爲從斬獲女功一顆土兵六
支亦被箭傷右腳隨將兩寨放火燒死男婦大小
三十餘口仍有惡番果卜賀太等餘黨見得勢大
各奔命逃散查往青片等寨躲避各職看得法從
武等思有地方之責屢憤岐山鴛木如二寨惡番
出沒爲害不靖奮力督兵自行攻克斬獲元惡首

級數多且不動官軍不求糧餉既能成功誠可嘉
獎土兵哭六兒伯什太等一十五名勇敢對敵殺
獲首惡均宜重賞其餘四卜來只什果并被傷六
只三秋保作六等三十餘名皆助力向前悉應犒
勞通事王蠻定保長劉朝進催兵探息亦宜量賞
以激微勞又查得法從武等所進兵機皆隴木頭
長官司土官坤兒卜籌謀決策指授發縱故獲全
勝尤當優獎其各首級欲令盡行梟掛恐起衆寨
猜疑合無止將首惡血羅呀即二顆梟示演武墩

以懲桀驁其餘姑令軍士領埋等因到道爲照岐
山等寨生番逼近州衛地方數十年來出沒爲患
殺擄樵牧軍民之憤非一日矣靜州長官司土舍
法從武等節年督兵追捕久效保障之勞近日糾
衆進攻大收斬獲之績隴木頭長官司土舍何効
義等協同心力剪戮兇酋土官坤兒卜密運奇謀
克成全捷誠足以奪隣番之氣而伸中國之威者
也旣經通判束載等覈勘功次明實委應獎賞以
勵將來合無候詳允日備行茂州動支庫貯商稅

銀兩買辦花紅照依後開等格獎犒其前項首級
姑將首惡二顆梟示餘級令軍兵掩埋及照兩寨
餘番傷殘旣衆讎怨必深而糾集惡類難保其終
不報復合行叅遊提督等官并靜州隴木各司整
兵設備慎加防範遇警飛報互相應援併力截殺
以靖地方照詳奉巡撫谷 批各土司官舍同謀
協力統兵奮勇殺賊成功良可嘉獎依擬分別犒
賞首惡賊級梟示仍行各將領加意防備不許怠
弛此繳

巡按鄭

批如擬給賞仍候撫院通行繳

郭襄靖公遺集

卷十一

四六

郭襄靖公遺集卷之十一

終